



Notat

Dato: 19.11.2015
Arkivsak: 2014/10030-61
Saksbehandlar: oddber3

Til:

Utval for opplæring- og helse
Fylkesutvalet

Frå:

Fylkesrådmannen

Oppfølging av skulebruksplanen – Sak 78/15 Opplærings- og helseutvalet

I samband med sak 78/15 sette representanten **Alexander Fosse Andersen** fram følgjande oversendingsforslag til administrasjonen:

- «1. Ber administrasjonen gjøre en vurdering av å flytte MK til Arna vgs sine lokalar, jfr. vedtak i skulebruksplanen, blant annet med tanke på
 - kostnad ved evt. ombygging
 - plankapasitet
2. Ber administrasjonen legge frem anslag på kostnad på evt. rehabilitering av Fana gymnas».

1. Flytte MK frå Garnes vgs til Arna vgs

I framlegget til skulebruksplanen som vart handsama i mars 2013, la fylkesrådmannen fram forslag om å flytte MK til Arna vgs. På det tidspunktet var MK eit yrkesfagleg studieprogram med ein gruppestorleik på 15 elevar – toårig løp. Arna vgs er ein liten yrkesfagleg skule med eit lite felles fagmiljø. Dette gjer at utgangspunktet for å legge eit studieførebuande program til skulen ikkje er ideelt med tanke på fagtilbodet til elevane. Frå hausten 2016 er MK gjort om til eit studieførebuande program med ein gruppestorleik på 30.

I vurderinga som er gjort her, er følgjande føresetnader lagt til grunn:

- Ingen nybygg eller påbygg
- Verknad frå skuleåret 2016/2017
- Utfasing av det eksisterande tilbodet på Garnes. MK Vg2 og Vg3 vert lagt til Arna vgs
- Innfasing av MK studiespesialiserande
- 1 parallell MK ved skulen på til saman 90 elevar. Tilsvarande reduksjon i dimensjoneringa ved ein annan skule i Bergen.
- Flytting av utstyr frå Garnes vgs til Arna vgs
- Eksisterande generelle undervisningsrom og naturfagsrom er tilstrekkelege

I føresetnadene lista opp over, er det siste kulepunktet mest kritisk. Her må ein gjere ei grundigare analyse i høve til læreplanar og areal for å kunne gi eit sikkert svar.

Arna vgs kan uansett ikkje ta imot MK utan ombyggingar. Dersom ein tek utgangspunkt i at MK skal leggest til skulen utan tilbygg, vil det vere naudsynt å bygge arealet som i dag er snikkarverkstad, om til undervisningsrom for MK. Kostnadene til naudsynt ombygging er vurdert til om lag kr 20 000 pr. kvm eller mellom 3 og 4 mill. kroner.

Leiinga ved Arna vgs ser det som svært uheldig å miste snikkarverkstaden. Dette er den einaste attverande snikkarverkstaden med fullt utrusta maskinpark på dei vidaregåande skulane i Hordaland og representerer difor ein unik ressurs. Verkstaden er eit verdifullt supplement i undervisninga for byggfagelevar samstundes som det er ein ettertrakta ressurs for eksterne aktørar. Både Kunsthøgskulen og Arkitekthøgskulen leiger verkstaden over lengre periodar årleg. I tillegg nyttar Opplæringskontoret for byggfag verkstaden til lærlingopplæring fram mot fagprøven.

Vidare vurderer fylkesrådmannen det som lite hensiktsmessig å legge tilbodet til ein skule utan studie-spesialisering. Denne vurderinga byggjer på at studiespesialisering i tillegg til MK gir fleksibilitet med tanke på dimensjonering av tilboda mellom to skuleår og gir grunnlag for eit breiare programfagtilbod for elevane.

2. Rehabilitering av Fana gymnas

I framlegget til skulebruksplan frå 2012 vart minimum i rehabiliteringskostnader oppgitt til om lag 75 mill. kroner, medan eigedomsavdelinga si overordna vurdering av rehabiliteringskostnader gjort i 2015, er på om lag 210 mill. Desse to anslaga kan ikkje samanliknast direkte. Den første vurderinga gir ikkje rom for endringar i strukturen i bygget, berre oppgradering av overflater og ei delvis oppgradering av tekniske anlegg. I tillegg viser erfaringstal frå andre prosjekt at 75 mill. er sett alt for lågt også for ei slik oppgradering.

I samband med stort fokus på godkjenning av skular etter «Forskrift om miljøretta helsevern i barnehagar og skular m.v.» i 2012, vart det ved eigedomsavdelinga gjort ei grov vurdering av etterslep i vedlikehaldet. Denne vurderinga var basert på utføring av vedlikehald på eksisterande bygg og tekniske installasjonar og i mindre grad oppgradering utanom det som var nødvendig for godkjenning av skulen. Kostnader for dette vedlikehaldsetterslepet og mindre oppgradering vart for Fana gymnas grovt vurdert til 75 mill. i 2012. Eigedomsavdelinga har i mange år gjennomført del-rehabilitering på eksisterande bygg, då gjerne avgrensa til tekniske installasjonar som varme- og ventilasjonsanlegg, elektroinstallasjonar og mindre bygningsmessige inngrep som nye vindauge, dører og tak.

Dei siste åra er det sett i gang større rehabiliteringsprosjekt der ein i stor grad prøver å oppgradere bygningsmassen til dagens forskriftskrav, TEK 10. Dette er gjort for at eldre skular, så langt som mogleg, skal ha ein kvalitet som gjer at alle lover og forskrifter er tilfredsstillt og at intensjonen i klimaplanen skal vere følgd opp. Det er også viktig at skulen vert sett i stand så raskt som mogleg og til eit nivå som gjer at ein ikkje må inn med forstyrrande arbeid år etter år. Fana gymnas består av ein eldre bygningsmasse frå 1916, 1932 og 1957.

Eigedomsavdelinga vurderer det slik at skal denne bygningsmassen framleis nyttast til skule, krev det omfattande rehabilitering. Dette er eit mykje meir omfattande arbeid enn det som var kalkulert til 75 mill. i 2012. Med erfaring frå liknande prosjekt, som rehabilitering av Årstad vidaregåande skule samt forprosjektmateriell frå andre rehabiliteringsprosjekt, ser ein at kostnadene fort kjem opp i 30.000,- kr/m². Dette er bakgrunnen for at ein har rekna at kostnader for omfattande rehabilitering av Fana gymnas vil ligge mellom 210 og 280 mill. Eit slikt omfattande prosjekt vil gjere at skulen må flyttast frå medan arbeidet pågår.

Fana gymnas vart bygd i ei tid då det ikkje var tenkt på at skulens innhald eller romstruktur trong endring i løpet av levetida til bygget. Det vil seie at bygget har svært dårleg fleksibilitet. Å endre romstorleik eller romstruktur er svært krevjande. Kostnader for større endringar ligg ikkje inne i den nye kalkyla. Det vil seie at sjølv etter ei stor rehabilitering vil skulen framleis ha små klasserom og dårleg logistikk. Bygget er også langt og smalt med mange ytterveggar i forhold til nyttearealet. Dette er svært energikrevjande, noko vi også ser på energioppfølginga.

Skal Fana gymnas framleis nyttast som vidaregåande skule, bør ny skule byggast. Erfaringstal for ny skule tilseier ein pris på ca. 40.000,- kr/m².

I samband med sak 78/15 sette representanten **Solbjørg Marjala frå Raudt** fram følgjande «bestilling» til administrasjonen:

"Kan me få ein oversikt over dei private skulene i heile fylket? I budsjettet (på side 40 og 41) får vi få ein oversikt over alle elevar på alle dei offentlege skulene i fylket. Her får vi også vite budsjettet til den enkelte skule og kor mykje den enkelte skule brukar per elev. Kan me få den same oversikta over dei private skulene, kva private skuler har vi, kva budsjett har den enkelte skule og kor mykje brukast per elev. Kan vi få det?"

Vidare har fylkestingsrepresentant **Terje Kollbotn** (Raudt) stilt fylkesrådmannen følgjande spørsmål:

1. *«I fylkesrådmannen sitt budsjettforslag for 2016 er det på s. 40 og s. 41 ein full oversikt over alle fylkeskommunale vidaregåande skular, med budsjett, elevtal, budsjett pr. elev og andel av elevtal.*
2. *Eg ber om tilsvarande oversikt over alle private vidaregåande skular i fylket.*
3. *Eg ber om full oversikt over eigarskap og finansiering av dei ulike private vidaregåande skulane i Hordaland.*
4. *Eg ber om svar på om noen av dei private vidaregåande skulane i Hordaland har vore granska av Utdanningsdirektoratet for brot på friskulelova, og i tilfelle kva skular og med kva resultat.»*

Når det gjeld tal på privatskular i Hordaland og elevtalet på dei respektive skulane, viser tabell 1 og tabell 2 under ei oversikt over dette. Tala er henta frå Statistisk sentralbyrå (SSB) og viser elevtala frå og med skuleåret 2011/2012 til og med skuleåret 2014/2015. Det er ikkje etablert nye private skular i Hordaland i 2015.

Tabell 1 viser elevtal på privatskular i Hordaland på alle utdanningsprogram:

Skule	Kommune	2011	2012	2013	2014
HOP VIDEREGÅENDE SKOLE	Askøy	31	32	54	75
AKADEMIET BERGEN AS	Bergen	404	404	463	497
BERGEN PRIVATE GYMNAS AS	Bergen	398	443	470	468
DANIELSEN INTENSIVGYMNAS	Bergen	319	316	317	311
DANIELSEN VIDEREGÅENDE SKOLE	Bergen	528	535	565	544
KROKEIDESENTERET AS	Bergen	96	157	143	152
RUDOLF STEINERSKOLEN I BERGEN	Bergen	64	52	60	56
SONANS VIDEREGÅENDE SKOLE BERGEN	Bergen	85	116	158	177
ST. PAUL SKOLE	Bergen	0	45	87	178
STEINERSKOLEN PÅ SKJOLD	Bergen	0	0	0	25
FRAMNES KRISTNE VIDAREGÅENDE SKULE	Kvam	254	252	261	265
KONGSHAUG MUSIKKGYMNAS	Os	92	90	89	91
Sum		2271	2442	2667	2839

Tabell 2 viser elevtal på privatskular i Hordaland på studiespesialiserande (ST)

Skule	Kommune	2011	2012	2013	2014
HOP VIDEREGÅENDE SKOLE	Askøy	0	0	0	0
AKADEMIET BERGEN AS	Bergen	234	237	295	338
BERGEN PRIVATE GYMNAS AS	Bergen	264	308	338	334
DANIELSEN INTENSIVGYMNAS	Bergen	319	316	317	311
DANIELSEN VIDEREGÅENDE SKOLE	Bergen	467	476	504	482
KROKEIDESENTERET AS	Bergen	0	0	0	0
RUDOLF STEINERSKOLEN I BERGEN	Bergen	64	52	60	56
SONANS VIDEREGÅENDE SKOLE BERGEN AS	Bergen	85	116	158	177
ST. PAUL SKOLE	Bergen	0	45	87	178
STEINERSKOLEN PÅ SKJOLD	Bergen	0	0	0	25
FRAMNES KRISTNE VIDAREGÅANDE SKULE	Kvam	165	162	171	175
12 KONGSHAUG MUSIKKGYMNAS	Os	0	0	0	0
Sum		1598	1712	1930	2076

Dei andre spørsmåla frå dei to representantane Marjala og Kollbotn gjeld opplysningar Hordaland fylkeskommune ikkje har direkte tilgang på. Fylkesrådmannen har difor retta ein førespurnad om dette til Utdanningsdirektoratet (UDIR) via Utdanningsavdelinga hjå Fylkesmannen i Hordaland. Fylkesrådmannen må difor kome tilbake til dette når det eventuelt ligg føre ei tilbakemelding frå UDIR.